

Communicaziun a las medias

29avel Top Pop Rumantsch: Entaup la primavaira

Cuiria, 05-04-2012 – **Il novischem 29avel Top Pop Rumantsch è ina collavuraziun straordinaria tranter musica da flad e gruppa da jazz: Ils Brass'n'Jazz ed Ursina Giger interpreteschan “Di per di”. El vegn preschentads per l'emprima giada ussa sonda, ils 07 d'avrigl 2012 el “magazin da cultura” da RTR Radiotelevisiun Svizra Rumantscha.**

Il di cumenza cun buna luna ed in pluna chaussas da far. Ma la protagonista stauscha avant sai tut ils pensums, fa enstagl chalenders e mira viador en il mund. «Oz ei semplamein buc miu di» resumescha ella vers la fin da la chanzun, la chanzun che porta il titel «Di per di». Ma la ligerezza da ses chant ed il schlantsch dals sturs davostiers laschan sminar ch'in tal di nunproductiv na saja betg il mender che po capitar. Anzi, igl è pura primavaira quai che quest 29avel Top Pop Rumantsch derasa, cun ses swing universal.

«Brass'n'Jazz» sa numna questa collavuraziun straordinaria da la Musica Vignogn cun la gruppa da jazz Clamür e la chantadura Ursina Giger. Al principi stat il project da concerts cuminaivels, inizià dal dirigent Remo Derungs; els han lieu durant il mais d'avrigl e duain unir e fructifitgar ils divers stils, dal marsch sur il pop enfin tar il jazz (guarda er sut brassnjazz.ch). La produenziun d'ina nova chanzun rumantscha è in rom lateral dal project: Pianist Christian Müller ha skizzà la melodia, Ursina Giger ha scrit il text ed l'arranschader professional Bela Balint ha procurà per il rest, dond al toc ina temprada da swing modern à la Michael Bublé. La registraziun basica ha gi lieu ina dumengia da fin mars en il renumà studio Powerplay a Maur, il chant è vegnì agiuntà a l'Aquarium Turitg intgins dis pli tard, tut sut la reschia da Manfred Zazzi. E gia gira la chanzun litteralmain «di per di» sur las undas dal Radio Rumantsch (RR), en la solita retscha Top Pop.

La Musica Vignogn exista dapi passa 90 onns, cumpiglia actualmain 32 chaus e vegn oz dirigida da Remo Derungs, reparader d'instruments e fervent fan da swing. Il quartet Clamür, furmà dal pianist Christian Müller, dal saxofonist Clau Maissen, dal bassist Lucas Schwarz e dal batterist Andriu Maissen, celebrescha gist quest onn ses 10avel anniversari e guarda enavos sin ina rotscha projects da tuts genres. Ursina Giger, creschida si a Mustér è mumentan sin via da finir la scola da jazz a Lucerna e chanta a la testa da numerusas gruppas, tranter quellas l'ensemble da worldmusic Quintinò e sia atgna band «Ursina».

Di per di

Sun oz levada ad uras
perquei ch'jeu hai aunc massa caussas da liquidar
entochen sera
per saver far si buna tschera.

Suenter il solver, sun sepinada,
hai priu pupi ed in rispli per ponderar
cun tgei ch'jeu duei entscheiver
co neziar il di e far il meglier.

Enstagl da far quei che fuss impurtont
fetg jeu gliestas e mirel viado el mund,
e smarvegliel co il temps varga,
senza ch'jeu vegnel in pass vinavon.

Sun aunc adina, sin baun cuschina
e spetgel sin in segn da su
che port'inspiraziun,
mo nuot schabegia,
jeu sedamondel sche quei gartegia.

Enstagl da far quei che stat oz sil plan
lege'jeu gasett'e schubregiel la cruna el bogn
e smarvegliel co il temps varga,
senza ch'jeu vegnel in pass vinavon.

Quei ch'jeu vegnel oz buc da far
stausch jeu semplamein sin damaun cul patertgar
ch'ei mondi lu bia meglier,
senza luvrar memia bia ella ga.

Pertgei che oz ei semplamein buc miu di
e tut quei ch'jeu entscheivel cun in surrir
vul buc finir
e strapazescha mia gnarva, tochen ch'jeu dundel si.

Sun oz levada ad uras
mo forsa fussi stau da durmir entochen miezdi
pertgei gidau hai buc massa
e la buna luna ei uss vargada.

Enstagl da far enzatgei che fa senn
ses'jeu en stiva e mes patratgs lunsch naven
e smarvegliel co il temps varga,
senza ch'jeu vegnel in pass vinavon.

Quei ch'jeu vegnel oz buc da far
stausch jeu semplamein sin damaun cul patertgar
ch'ei mondi lu bia meglier,
senza luvrar memia bia ella ga.

Pertgei che oz ei semplamein buc miu di
e tut quei ch'jeu entscheivel cun in surrir
vul buc finir
e strapazescha mia gnarva, tochen ch'jeu dundel si.



Top Pop Rumantsch è ina seria da producziuns da musica nova ed actuala, lantschada da RTR Radiotelevisiun Svizra Rumantscha l'onn 2005. Tut ils titels da la seria èn d'udir sin la pagina d'internet da RTR sut:

<http://www.rtr.ch/home/dossiers/actual/Top-Pop-Rumantsch.html>

ubain directamain qua:



Dapli infurmaziuns:

Radiotelevisiun Svizra Rumantscha

René Spescha

Tel. 081 255 75 75

E-Mail: rene.spescha@rtr.ch